

TABULA CENTESIMA SEPTUAGESIMA SEPTIMA.

**H***elleborine*, florum foliis maculosis & longissimis. *Plum. Cat. p. 9.*

**EPIDENDRUM** foliis radicalibus, lanceolatis, nervosis; petalis maculatis, caudatis; duobus longissimis, erectis.

*Planta* parasytica, radices agens vermiformes, prorepentes, quibus supra arbores prorepat.

*Folia* radicalia, crassa, nervosa, bina connata, erecta, lanceolata.

*Scapus* simplex erigitur nudus, cinctus aliquot squamis erectis, acutis, quæ superius desinunt, ubi flores proveniunt.

*Flores* hi mirabilis sunt formæ, eleganter maculati, quorum petala tria caudata, bina nempe horisontalia brevissima, inferius dependens, longius, bina reliqua, seu superiora longissima, erecta, subulata: Cucullus in ipsorum centro locatur; stamina cum germine tenens, ita ut hæc planta sit distinctissima a reliquis congeneribus petalis maculatis, tum & caudatis, longissimisque erectis; nec ab ullo alio observata auctore, uti & plures hujus generis subsequentes.

*Fructus* est filiqua oblonga, carnosa, quinque sulcata, petala emarcida superne gerens, qualis delineata in inferiore Tabulæ parte conspicitur.